

四庫全書

子部

欽定四庫全書

子部

神農本草經疏卷十一

詳校官太醫院恩糧臣孔毓秀

編修臣倉聖脈覆勘

總校官進士臣繆琪

校對官中書臣吳俊

謄錄監生臣鰲圖

欽定四庫全書

神農本草經疏卷十

明 繆希雍 撰

草部下品之上

總六十二種今疏其要者一十六種

附子

半夏

大黃

葶藶

桔梗

草蒿

旋復花

藜蘆

射干

常山

甘遂

白欬

白及

大戟

貫衆

羊躑躅

附子味辛甘溫大熱有大毒主風寒欬逆邪氣溫中金
瘡破癥堅積聚血瘀寒濕踈臂拘攣膝痛脚疼冷弱不
能行步腰脊風寒心腹冷痛霍亂轉筋下痢赤白堅肌
骨強陰又墮胎為百藥長冬月採為附子春採為烏頭

忌豉汁得蜀椒食鹽可引之下行地膽為之使
惡蜈蚣長防風黑豆甘草黃耆人參童便犀角

疏○附子全稟地中火土燥烈之氣而兼得乎天之熱氣故其氣味皆大辛大熱微兼甘苦而有大毒氣厚味薄陽中之陰降多升少浮中沉無所不至入手厥陰命門手少陽三焦兼入足少陰太陰經其性走而不守得甘草則性緩得肉桂則補命門本經主風寒欬逆邪氣寒濕踠臂拘攣膝痛脚疼冷弱不能行步以此諸病皆由風寒濕三邪客之所致也邪客上焦則欬逆邪客下焦則成踠臂拘攣膝痛脚疼冷弱

不能行步此藥性大熱而善走故亦善除風寒濕三邪三邪祛則諸證自瘳矣癥堅積聚血瘀皆血分虛寒凝而不行所成血得熱則行故能療之其主金瘡亦謂金瘡為風寒所鬱擊血瘀不活之證而非血流不止之金瘡也別錄又主腰脊風寒脚氣冷弱心腹冷痛及脾虛寒客中焦為霍亂客下焦肝腎之分為轉筋借諸補氣藥則溫中補血藥則強陰堅肌骨火能消物氣性熱極入血善行故善墜胎為百藥長引

參朮黃耆茯苓則溫煖脾胃除脾濕祛腎寒補下焦
陽虛佐之以桂則除臟腑沈寒三焦厥逆濕淫腹痛
胃寒虬動氣虛經閉補陽虛散虛壅亦可入足太陽
少陰故治督脈為病脊強而厥督脈夾脊而上並足
太陽膀胱經膀胱者腎之府故主之也天雄烏頭附
子本是同生第其形質有異老嫩或殊大熱大毒則
未始有別也

主治參互

附子得生乾薑桂枝主傷寒直中陰經溫中散寒而
能出汗 佐人參兼肉桂五味子則補命門相火不
足回陽有神 得人參肉桂治元氣虛人暴寒之氣
入腹腹痛作泄完穀不化小水不禁佐白朮為除寒
濕之聖藥 得黃耆人參炙甘草白芍藥橘皮五味
子主癰疽潰後去膿血過多以致飲食不進惡心欲
嘔飲食不化不生肌肉亦主久漏冷瘡 得人參白
芍藥炙甘草砂仁橘皮主小兒慢驚加蓮肉白藕豆

則治吐瀉不止 得朮桂牛膝木瓜橘皮主寒疝痛
極立止 得朮木瓜石斛萆薢薏苡仁橘皮茯苓治
風濕麻痺腫痛脚氣之無熱證者輒驗 得人參橘
皮主久病嘔噦反胃虛而無熱者良 經曰腎苦燥
急食辛以潤之附子同肉桂之辛入八味丸以潤腎
燥陽虛無熱證者宜之

簡誤

附子既稟地二之火氣兼得乎天之熱氣以生是陰

陽湊合無非火熱為性氣味皆然毒可知已論其性質之所能乃是退陰寒益陽火兼除寒濕之要藥引補氣血藥入命門益相火之上劑若非陰寒寒濕陽虛氣弱之病而誤用之於陰虛內熱血液衰少傷寒溫病熱病陽厥等證靡不立斃謹列其害如左醫師司命宜詳玩而深鑒之亦生人之大幸也傷寒陽厥其外證雖與陰厥相類而其內實不相侔何者陽厥之病若係傷寒溫疫其先必發熱頭疼口渴其後雖

頭不疼而表熱已除然必面赤顴紅二便不利小水必赤或短少是其候也此當下之病也產後血虛角弓反張病名曰瘓瘓者勁也是去血過多陰氣暴虛陰虛生內熱熱則生風故外兼現乎風證其實乃陰血不足無以榮養於筋所致足厥陰肝家大虛之候此宜益陰補血清熱則愈也故凡病人一見內熱口乾咽乾口渴渴欲引飲咳嗽多痰煩躁五心煩熱骨蒸勞熱惡寒陰虛內熱外寒虛火上攻齒痛脾陰不

足以致飲食無味小便黃赤短澀及不利大便不通
或燥結腹內覺熱悶喜飲冷漿及鮮果畏火及日光
兼畏人聲水聲虛陽易興夢洩不止產後發熱產後
血行不止及惡瘡臭穢小產增寒壯熱中暑厥暈陰
虛頭暈中暑暴泄利下如火赤白滯下小兒中暑傷
食作泄小便短赤口渴思飲血虛腹痛按之即止火
炎欲嘔外類反胃而惡熱焦煩得寒暫止中熱腹中
絞痛中暑霍亂吐瀉或乾霍亂或久瘧寒熱並盛或

赤白濁赤白淋尿血便血血崩吐衄齒衄舌上出血
目昏神短耳鳴盜汗汗血多汗惡熱老人精絕陽痿
少年縱慾傷精以致陰精不守精滑腦漏婦人血枯
無子血枯經閉腎虛小便餘瀝血虛大便燥結陰虛
口苦舌乾心經有熱夢寐紛紜下部濕熱行履重滯
濕熱痿痺濕熱作泄濕熱腳氣小兒急驚內熱痘瘡
乾焦黑陷痘瘡火閉不出痘瘡皮薄嬌紅痘瘡因熱
咬牙痘瘡挾熱下利痘瘡餘毒生癰中風殭仆不語

中風口眼歪邪中風語言蹇澀中風半身不遂中風
痰多神昏一切癱疽未潰金瘡失血發瘧血虛頭痛
偏頭風痛上來內外男婦小兒共七十餘症病屬陰
虛及諸火熱無關陽弱亦非陰寒法所均忌倘誤犯
之輕變為重重者必死枉害人命此藥居多臨證施
治宜謹審之世徒見其投之陽虛之候肺腎本無熱
證者服之有起死之殊功而不知其用之陰虛如上
諸病亦復下咽莫救故特深著其害以表其非嘗試

輕用之藥也。紫醫君子可不慎諸。

半夏味辛平。生微寒。熱溫有毒。主傷寒寒熱。心下堅下氣。咽喉腫痛。頭眩胸脹。欬逆腸鳴。止汗消心。腹胸膈痰熱。滿結咳嗽。上氣心下急痛。堅痞時氣。嘔逆消癰。腫墮胎療。痿黃悅澤。面目生令人吐。熟令人下。用之湯洗令

滑盡

射干為之使。惡皂莢。畏雄黃。生姜。乾姜。秦皮。鼈甲。反烏頭。忌羊血。海藻。飴糖。

疏○半夏得土金之氣。兼得乎天之燥氣。故其味辛

平。苦溫。火金相搏。則辛而有毒。潔古謂味辛。苦性溫。

氣味俱薄沈而降好古謂其辛厚苦輕陽中陰也入
足太陰陽明少陽亦入手少陰經柴胡為之使辛溫
善散故主傷寒邪在表裏之間往來寒熱苦善下泄
邪在胸中則心下堅胸脹欬逆邪在上焦則頭眩邪
在少陰則咽喉腫痛別錄亦謂其消心腹胸膈痰熱
滿結欬逆上氣心下急痛堅痞時氣嘔逆亦皆邪在
上焦胸中之所致故悉主之也中焦者足太陰之所
治也有濕有熱清濁不分則腸鳴濕熱勝則自汗入

足太陰故并主之辛能散結故消癰腫脾家濕熱則面色痿黃實脾分水燥濕則前證俱除面目因而滑澤矣辛溫有毒故墮胎也

主治參互

張仲景傷寒論小結胸痛正在心下按之則痛脈浮而滑者小陷胸湯主之半夏半升黃連一兩栝樓實大者一箇水六升先煮栝樓至三升去滓內二味煮取二升分三服 又治少陰咽痛生瘡不能言語聲

不出者苦酒湯主之半夏七枚打碎雞子一枚頭開
一竅去黃納苦酒令小滿入半夏在內以環子坐於
炭火上煎三沸去滓置盃中時時嚙之極驗未瘥更
作 金匱要略治支飲作嘔嘔家本渴不渴者心下
有支飲也或似喘不喘似嘔不嘔似噦不噦心下憤
憤並宜小半夏湯用半夏泡七次一升生薑半升水
七升煮一升五合分溫服 又治嘔噦眩悸穀不得
下半夏加茯苓湯半夏一升生薑半斤茯苓三兩切

以水七升煎一升半分溫服之 又心下悸忪半夏
麻黃丸半夏麻黃等分為末蜜丸小豆大每服三十
丸日三 又嘔吐反胃大半夏湯半夏三升人參三
兩白蜜一升水一斗二升和揚之一百二十遍煮取
三升半溫服一升日再服亦治膈間支飲 又張仲
景方治黃疸喘滿小便自利不可除熱者用半夏半
斤生薑半斤水七升煮一升五合分再服有一人氣
結而死心下暖以此少許入口其人遂活 潔古活

法機要方風痰頭暈嘔逆目眩面青黃色脈弦者水
煮金花丸用生半夏生天南星寒水石煨各一兩天
麻半兩雄黃二錢小麥麵三兩為末水和成餅水煮
浮起漉出搗丸梧子大每服五十九薑湯下極效亦
治風痰咳嗽二便不通風痰頭痛 又治風痰喘逆
兀兀欲吐眩暈欲倒半夏一兩雄黃三錢為末薑汁
浸蒸餅丸梧子大每服三十九薑湯下已吐者加檳
榔 又治濕痰咳嗽面黃體重嗜卧兼食不消脈緩

者白朮丸用半夏南星各一兩白朮一兩半為末薄糊丸梧子大每服五十九薑湯下 又治氣痰咳嗽

面白氣促洒淅惡寒愁憂不樂脈澹者玉粉丸用半

夏南星各一兩官桂半兩為末糊丸梧子大每服五

十九薑湯下 和劑局方治停痰留飲胸膈滿悶氣

短惡心飲食不下或吐痰水茯苓半夏湯用半夏泡

五兩茯苓三兩每服四錢薑七片水一鍾半煎七分

甚捷徑 又搜風化痰安神定志利頭目辰砂化痰

丸用半夏麩三兩天南星炮一兩辰砂枯礬各半兩
為末薑汁打糊丸梧子大每服三十九食後薑湯下

又治風痰喘急干緡湯用半夏湯洗七箇甘草炙

皂莢炒各寸許薑三片水一盞煎七分溫服 又治

停痰冷飲嘔逆橘皮半夏湯用半夏水煮熟陳橘皮
各半兩每服四錢生薑七片水二盞煎一盞溫服

又治胃寒噦逆停痰留飲藿香半夏湯用半夏湯泡
炒黃二兩藿香一兩丁皮半兩每服四錢水一盞薑

七片煎服 又治伏暑引飲脾胃不和消暑丸用半
夏醋煮一斤茯苓半斤生甘草半斤為末薑汁麵糊
丸梧子大每服五十九熱湯下 又治中焦痰涎利
咽清頭目進飲食半夏泡七次四兩枯礬一兩為末
薑汁打糊或煮棗肉和丸梧子大每薑湯下十五丸
寒痰加丁香五錢熱痰加寒水石煨四兩名玉液丸
御藥院方治膈壅風痰半夏半斤酸漿浸一宿溫
湯洗五十遍去惡氣日乾為末漿水搜作餅日乾再

研為末每五兩入生龍腦一錢以漿水濃脚和丸雞
頭子大紗袋盛避風處陰乾每服一九好茶或薄荷
湯嚼下 葉氏方治風痰濕痰青壺丸半夏一斤天
南星八兩各湯泡晒乾為末薑汁和作餅焙乾入神
麩半兩白朮末四兩枳實末二兩薑汁麩糊丸梧子
大每服五十九薑湯下 作三仙丸能化痰利氣
斗門方消痰開胃去胸膈壅滯用半夏洗泡焙乾為
末自然薑汁和作餅濕紙裏煨香以熟水二盞同餅

二錢入鹽五分煎一盞服之大壓痰毒及酒食傷極
驗 機要又治結痰不出語音不清年久者亦宜玉
粉丸半夏半兩桂心一字草烏半字為末薑汁浸蒸
餅丸芡實大每服一九夜卧含嚙 活幼口議治小
兒痰吐或風壅所致或咳嗽發熱飲食即嘔半夏泡
七次半兩丁香三錢以半夏末水和包丁香用麵重
包煨熟去麵為末生薑自然汁和丸麻子大每服二
三十九陳皮湯下 肘後方治冒寒霍亂腹脹用半

夏桂枝等分為末水服方寸匕 又治產後暈絕半

夏末冷水和丸大豆大納鼻中即愈此扁鵲法也

水類鈴方打撲瘀痕水調半夏末塗一宿即沒 魏

元君方卒死不寤用半夏末吹鼻中即活 子母秘

錄治五絕急病一曰自縊二曰牆壓三曰溺水四曰

魘魅五曰產乳並以半夏末納大豆一九入鼻中心

溫者一日可活也 劉長春經驗方治吹奶腫痛半

夏一箇煨研酒服立驗一方以末隨左右嚙鼻効

篋中方治蝎蠆螫人用半夏末水調塗之立止

簡誤

半夏辛溫性燥而有毒雖能祛濕分水實脾開寒濕痰氣鬱結痰而其所大忌者乃在陰虛血少津液不足諸病故古人立三禁謂血家渴家汗家也故凡一切吐血衄血咯血齒衄舌上出血金瘡產後失血過多尿血便血腎水真陰不足發渴中暑發渴陽虛自汗陰虛盜汗內熱煩躁出汗諸證皆所當禁者也然

三禁之外應忌者尚多茲更詳列於後凡咳嗽由於陰虛火空上炎燥肺喉痒因而發嗽內熱煎熬津液凝結為痰所致而不由於寒濕病本乎肺而不本乎脾嘔吐由於火衝胃熱而不由於寒濕痰壅飲食不化由於脾陰不足而不由於因濕脾慢嘔噦眩悸穀不得下由於胃氣虛弱見食厭惡而不由於寒濕邪所干霍亂腹脹由於脾虛邪熱客中焦而不由於寒濕飲食停滯咽痛由於陰虛腎水不足則水涸而陽

無所附故火空上炎而發咽痛而不由於傷寒少陰
病邪熱不解氣喘由於氣虛而不由於風寒所鬱頭
痛由於血虛而不由於痰厥小兒吐痰由於傷熱而
不由於脾胃不寐由於心經血少而不由於病後膽
虛自汗由於表虛腠理不固而不由於濕熱內容自
勝如上諸證法所同禁其所最易誤而難明者世醫
類以其能去痰凡見痰嗽莫不先投之殊不知咳嗽
吐痰寒熱骨蒸類皆陰虛肺熱津液不足之候誤服

此藥愈損津液則肺家愈燥陰氣愈虛濃痰愈結必致聲啞而死若合參朮禍不旋踵蓋以其本脾胃家藥而非肺腎藥也寒濕痰飲作嗽屬胃病者固宜然亦百之一二其陰虛火熾煎熬真陰津液化為結痰以致喉痒發咳者往往而是故凡痰中帶血口渴咽乾陰虛咳嗽者大忌之又有似中風痰壅失音偏枯拘攣及二便閉澀血虛腹痛於法並忌犯之過多則非藥可救吉凶貿理悔不可追責在司命謹諸戒諸

大黃味苦寒大寒無毒主下瘀血閉寒熱破癥瘕積聚留飲宿食蕩滌腸胃推陳致新通利水穀調中化食安和五藏平胃下氣除痰實腸間結熱心腹脹滿女子寒血閉脹小腹痛諸老血留結

黃芩為之使無所畏

疏○大黃稟地之陰氣獨厚得乎天之寒氣亦深故其味至苦其氣大寒而無毒入足陽明太陰厥陰并入手陽明經氣味俱厚味厚則發泄故其性猛利善下泄推陳致新無所阻礙所至蕩平有戡定禍亂之

功故號將軍味厚則入陰分血者陰也故主下瘀血
血閉寒熱癥瘕積聚留飲宿食蕩滌腸胃通利水穀
其曰調中化食安和五藏者槩指臟腑積滯既去則
實邪散而中自調臟自和也別錄又云平胃下氣除
痰實腸間結熱心腹脹滿女子寒熱女子因寒血凝
閉而作脹少腹痛因於血閉及諸老血留結皆由通
利開導之力所致也總之此藥乃除實熱燥結下有
形積滯之要品隨經隨證以為佐使則奏功殊疾矣

主治叅互

大黃君枳實厚朴為小承氣湯治傷寒熱病邪結中焦
治傷寒病發於陰而反下之心下滿而不痛按
之濡此為痞也大黃黃連瀉心湯主之大黃二兩黃
連一兩以麻沸湯二升漬之須臾絞汁分作二次溫
服 潔古用以瀉諸實熱不通及瀉心下痞滿由於
實皆本仲景法也 亦治滯下赤白初起壯實之人
可同枳殼檳榔當歸甘草滑石作丸投之是迎而奪

之之法也然不可過劑過劑則傷胃氣 同城及白
斂炒陳小粉沒藥乳香醋蜜調傳作癰腫圍藥 凡
實熱濕痰為病以錦紋大黃酒蒸八兩入前胡八兩
橘紅四兩外另以青礞石二兩同焰硝二兩入砂罐
固濟煨紅研末二兩右各取末以水發為丸梧子大
每常服一二十九小病五六十丸緩病七八十九丸急
病一百二十九溫水吞下即卧勿動候藥逐上焦痰
滯次日先下糟粕次下痰涎未下再服惟妊娠水泄

忌之 仲景金匱玉函方云凡人食已即吐此胸中
有火也大黃一兩甘草炙二錢五分水一碗煮半升
溫服此真方滾痰丸也治一切因痰發為怪證若入
霞天膏為丸更妙 西大黃拌蜜及竹瀝九蒸九晒
粉糊為丸如麻子大薄荷湯吞三錢治中上二焦有
熱痰因發偏頭風諸藥不効目將損者有殊功又治
中焦脾胃濕熱下流客腎以致飽後夜卧即夢遺臨
卧以升麻陳皮湯吞三四錢濕熱去即止

簡誤

經曰實則瀉之大黃氣味大苦大寒性稟直遂長於
下通故為瀉傷寒溫病熱病實熱結中下二焦二
便不通及濕熱膠痰滯於中下二焦之要藥祛邪止
暴有撥亂反正之殊功第其峻利之性猛烈之氣長
驅直搥一往不返如武王伐紂前徒倒戈血流漂杵
雖應天順人救民水火然亦不免於未盡善之議矣
故凡血閉由於血枯而不由於熱積寒熱由於陰虛

而不由於瘀血癥瘕由於脾虛胃弱而不由於積滯
停留便閉由於血少腸燥而不由於熱結不通心腹
脹滿由於脾虛中氣不運而不由於飲食停滯女子
少腹痛由於厥陰血虛而不由於經阻老血瘀結滯
下初起即屬胃虛當以補養胃氣清消濕熱為本而
不可以妄加推蕩瘡病傷於暑氣而不由於山嵐濕
熱吐血由於陰虛火起於下炎鑠乎上血熱妄行
溢出上竅而不由於血分實熱腰脚風氣由於下元

先虛濕熱下流因茲致病而不專由於風濕外侵骨蒸積熱本於陰精不足而非實熱所致偏墜由於腎虛濕邪乘虛客之而成而不由於濕熱實邪所犯乳癰腫毒由於肝家氣逆鬱抑不舒以致勞氣不從逆於肉裏乃生癰腫而不本於膏粱之變足生大疔血分積熱所發法咸忌之以其損傷胃氣故也故傷寒家調胃承氣湯中用甘草以和之正謂是也輕發誤投多致危殆戒之戒之

葶藶味辛苦寒大寒無毒主癥瘕積聚結氣飲食寒熱
破堅逐邪通利水道下膀胱水伏留熱氣皮間邪水上
出面目浮腫身暴中風熱痺痒利小腹久服令人虛得
酒良

疏○葶藶稟陰金之氣以生故其味辛苦大寒無毒
氣薄味厚陽中陰也為手太陰經正藥故仲景瀉肺
湯用之亦入手陽明足太陽經肺屬金主皮毛膀胱
屬水藏津液肺氣壅塞則膀胱與馬譬之上竅閉則

下竅不通下竅不通則水濕泛溢為喘滿為腫脹為積聚種種之病生矣辛能散苦能泄大寒沉陰能下行逐水故能療本經所主諸病十劑云泄可去閉葶藶之屬是矣至苦極寒有瀉無補暫用尚能損真久服寧不令人虛也

主治參互

金匱方肺癰喘急不得卧葶藶大棗瀉肺湯主之葶藶炒黃搗末蜜丸彈子大每用大棗二十枚水三升

煎取二升入葶藶一九更煎取一升頓服亦主支飲
不得息 外臺秘要通身腫滿苦葶藶炒四兩為末
棗肉和丸梧子大每服十五丸桑白皮湯下日三大
効 千金方腹脹積聚葶藶子一升熬以酒五升浸
七日日服三合 篋中方痰飲咳嗽含竒丸用葶藶
子一兩紙襯炒令黑知母貝母各一兩棗肉半兩砂
糖一兩半和丸彈子大每以新綿裹一九含之嚙津
甚者不過三丸

簡誤

葶藶瀉肺利小便治腫滿之要藥然味苦大寒走而不守不利於脾胃虛弱及真陰不足之人凡腫滿由於脾虛不能制水水氣泛溢小便不通由於膀胱虛無氣以化者法所咸忌犯之則輕病重重必危慎之近世甜苦二種據本經云辛苦則甜者非矣總之療體皆以行水泄閉為用多服久服咸不宜耳

桔梗味辛苦微溫有小毒主胸脅痛如刀刺腹滿腸鳴

幽幽驚恐悸氣利五藏腸胃補血氣除寒熱風痺温中
消穀療喉咽痛下蠱毒

疏○桔梗本經味辛氣微温別錄加苦云有小毒神
農醫和岐伯雷公咸曰無毒而復加甘觀其所主諸
病應是辛苦甘平微温無毒入手太陰少陰兼入足
陽明胃經味厚氣輕陰中之陽升也傷寒邪結胸脇
則痛如刀刺邪在中焦則腹滿及腸鳴幽幽辛散升
發苦洩甘和則邪解而氣和諸證自退矣其主驚恐

悸氣者心脾氣血不足則現此證諸補心藥中藉其
升上之力以為舟楫勝載之用此佐使之職也別錄
利五臟腸胃補血氣者蓋指邪解則臟腑腸胃自和
和則血氣自生也除寒熱風痺溫中療喉咽痛下蠱
毒者皆散邪解毒通利之功也消穀者以其升載陽
氣使居中焦而不下陷則脾中陽氣長浮而穀食自
消矣甄權用以治下痢及去肺熱氣促者升散熱邪
之故也日華子用以除邪辟瘟肺癰排膿潔古用以

利竅除肺部風熱清利頭目咽嗑胸膈滯氣及痛除
鼻塞者入肺開發和解之功也好古以其色白故為
肺部引經與甘草同行為舟楫之劑諸藥有此一味
不能下沉也

主治參互

朱肱活人書治胸中痞滿不痛用桔梗枳殼取其通
肺利膈下氣也 張仲景傷寒論治傷寒實結胸用
桔梗貝母巴豆取其溫中散邪消穀破積也又治肺

癰唾膿用桔梗甘草取其辛苦清肺甘溫瀉火又能
排膿血補內漏也其治少陰證二三日咽痛亦用桔
梗甘草取其苦辛散邪甘平除熱合而用之能調寒
熱也後人易名甘桔湯通治咽喉口舌諸病 南陽
活人書治傷寒腹脹陰陽不和者桔梗半夏湯主之
桔梗半夏陳皮各三錢薑五片煎服 簡要濟衆方
治痰嗽喘急桔梗一兩半為末用童子小便半升煎
四合去滓溫服 仲景金匱玉函方治肺癰咳嗽胸

滿振寒脈數咽乾不渴時出濁唾腥臭久久吐膿如
粳米粥者桔梗一兩甘草二兩水三升煮一升分溫
再服朝暮吐膿血則瘥 千金方治喉痺毒氣桔梗
二兩水三升煮一升頓服 仲景傷寒論少陰證二
三日咽痛者可與甘草湯不瘥者與甘桔湯主之桔
梗一兩甘草二兩水三升煮一升分服又可治口舌
生瘡 永類鈴方治齒齲腫痛桔梗薏苡仁等分為
末服 經驗方治骨槽風牙齲腫痛者桔梗為末棗

瓢和丸皂子大綿裹咬之仍以荆芥湯漱之 衛生

易簡方治牙疳臭爛桔梗茴香等分燒研傅之 晉

濟方治鼻衄桔梗為末水服方寸七日四服一方加

生犀角屑 古今錄驗方治中蠱下血如雞肝晝夜

出血石餘四臟皆損惟心未毀或鼻破將死者苦梗

為末以酒服方寸七日三服不能下藥以物拘口灌

之心中當煩須臾自定七日止當食猪肝肺以補之

一方加犀角等分 聖惠方治妊娠中惡心腹疼痛

桔梗一兩生薑三片煎溫服 張文仲備急方治小
兒客忤死不能言桔梗燒研三錢米湯服之仍吞麝
香豆許

簡誤

桔梗之性屬陽而升凡病氣逆上升不得下降及邪
在下焦者勿用凡攻補下焦藥中勿入雷公云凡使
勿用木梗真似桔梗只是咬之腥澀不堪為異

草蒿味苦寒無毒主疥瘙癢惡瘡殺五蟲留熱在骨節

間明目一名青蒿

疏○草蒿青蒿也稟天地芬烈之氣以生故其味苦其氣寒而芬芳其性無毒疥癩痲痒惡瘡皆由於血熱所致留熱在骨節間者是熱伏於陰分也肝胃無熱則目明苦能泄熱苦能殺蟲寒能退熱熱去則血分平和陰氣日長前證自除故悉主之也諸苦寒藥多與胃氣不宜惟青蒿之氣芬芳可人香氣先入脾故獨宜於血虛有熱之人以其不犯胃氣故爾是以

蓐勞虛熱非此不除矣

主治參互

青蒿得鼈甲地黃牛膝枸杞麥門冬五味子除一切
產後虛熱寒熱淹延不解亦治一切虛勞寒熱陰虛
五心煩熱腎水真陰不足以致骨蒸勞熱此為要藥
陶隱居謂其生按傳金瘡大止血生肉止疼痛以
帛裹之 陳藏器謂其主鬼氣尸疰伏留婦人血氣
腹內滿及冷熱久痢秋冬用子春夏用苗 日華子

謂其能補中益氣輕身補勞駐顏色長毛髮髮黑不
老心痛熱黃主搗汁服 百一方治蜂螫人嚼青蒿
傅瘡上即瘥 斗門方治男婦勞瘦用青蒿細剉水
三升童便五升同煎取一升半去滓入器中煎成膏
丸如梧子大每空心及臨卧溫酒吞二十九 靈苑
方治虛勞寒熱肢體倦疼不拘男婦八九月青蒿成
實時採之去枝梗以童便浸三日晒乾為末每服二
錢烏梅一箇煎湯服 崔元亮海上方治骨蒸鬼氣

用童便五大斗澄清青蒿五斗八九月採帶子者最好細剉相和納大釜中以猛火煎取三大斗去滓漑釜令淨再以微火煎可二大斗入猪膽一枚同煎一大斗半去火待冷以磁器盛之每欲服時取甘草二三兩炙熟為末以煎和搗干杵為丸空腹粥飲下二十九漸增至三十九止 十便良方治骨蒸煩熱用青蒿一握猪膽汁一枚杏仁四十個去皮尖炒以童溺一大盞煎五分空心溫服 聖惠總錄治虛勞盜

汗煩熱口乾用青蒿一斤取汁熬膏入沙參末麥冬末各一兩同熬至可丸丸如梧子大每食後米飲服二十九名青蒿煎 肘後方治瘧疾寒熱用青蒿一握水二升搗汁服之 仁存方治溫瘧痰盛但熱不寒用青蒿二兩童便浸焙黃丹半兩為末每服二錢白湯調下 衛生易簡方治鼻衄青蒿搗汁服之并塞鼻中極驗 永類鈐方治酒痔便血青蒿用葉不用莖用莖不用葉為末血從糞前冷水調糞後溫酒

調服 濟急方治牙齒腫痛青蒿一握煎漱之 聖
惠方治耳中出膿青蒿為末綿裹納耳中

簡誤

產後氣虛內寒作瀉及飲食停滯泄瀉者勿用凡產
後脾胃薄弱忌與當歸地黄同用

旋覆花味鹹甘溫微溫冷利有小毒主結氣脇下滿驚
悸除水去五藏間寒熱補中下氣消胸上痰結唾如膠
漆心脇痰水膀胱留飲風氣濕痺皮間死肌目中眇瞤

利大腸通血脈益色澤一名金沸草五月采花日乾

疏○旋覆花別錄甄權日華子寇宗奭皆無毒宗奭
又加苦辛而曰冷利其稟冬之氣而生者乎故其味
首係之以鹹潤下作鹹鹹能軟堅別錄加甘甘能緩
中微溫溫能通行故主結氣脇下滿心脾伏飲則病
驚悸飲消則復常矣除水去五臟間寒熱及消胸上
痰結唾如膠漆心脇痰水膀胱留飲風氣濕痺皮間
死肌目中眵膜利大腸者皆軟堅冷利潤下消痰飲

除水之功也其曰補中下氣者以甘能緩中鹹能潤下故也通血脈益色澤者蓋指飲消則脾健健則能運行脾裏血又統血故也

主治參互

仲景治傷寒汗下後心下痞堅噫氣不除有七物旋覆代赭湯成無已曰鞭則氣堅旋覆之鹹以軟痞堅也 金匱要略治半產漏下虛寒相搏其脈弦芤旋覆花湯用旋覆花三兩葱十四莖新絳少許水三升

煮一升頓服 胡洽治痰飲在兩脇脹滿有旋覆花
丸 總微論治小兒眉癬自眉毛眼睫因癬退不生
用野油花即旋覆花赤箭即天麻苗防風等分為末
洗淨以油調塗之

簡誤

丹溪謂為走散之藥病人涉虛者不宜多服冷利大
腸虛寒人禁用

藜蘆味辛苦寒微寒有毒主蠱毒欬逆洩痢腸澼頭瘍

疥癢惡瘡殺諸蟲毒去死肌療噦逆喉痺不通鼻中息
肉馬刀爛瘡不入湯

疏○藜蘆稟火金之氣以生故其味辛氣寒別錄苦
微寒有毒入手太陰足陽明經本經主蠱毒欬逆及
別錄療噦逆喉痺不通者皆取其宣壅導滯之力苦
為涌劑故能使邪氣痰熱胸膈部分之病悉皆吐出
也辛能散結故主鼻中息肉苦能泄熱殺蟲故主洩
痢腸澼頭瘍疥癢殺諸蟲毒也瘡瘍皆濕熱所生濕

熱不去則肌肉潰爛苦寒能瀉濕熱則馬刀惡瘡爛
瘡死肌皆愈也味至苦入口即吐故不入湯

主治叅互

經驗方諸風痰飲藜蘆十分鬱金一分為末每以一
字溫漿水一盞和服探吐 簡要濟衆方中風不省
牙關緊急者藜蘆一兩去苗濃煎防風湯洗焙乾切
片炒為末每服半錢小兒減半溫水調灌吐出風涎
効 聖惠方諸風頭痛以藜蘆一莖日乾研末入麝

香少許吹鼻 保命集久瘧痰多不食欲吐不吐藜
蘆末半錢溫漿水調下探吐

簡誤

藜蘆辛苦有大毒服一七則令人胸中煩悶吐逆不
止凡胸中有痰飲或中蠱毒惡氣者止可借其上涌
宣吐之力獲効一時設病非關是者切勿沾唇徒令
人悶亂吐逆不止虧損津液也

射干味苦平微溫有毒主欬逆上氣喉痺咽痛不得消

息散結氣腹中邪逆食飲大熱療老血在心脾間欬唾
言語氣臭散胸中熱氣久服令人虛

疏○射干稟金氣而兼火火金相搏則辛而有毒故
本經謂其味苦平有毒平亦辛也別錄微溫保昇微
寒二說一義並無異云潔古云味苦陽中陰也入手
少陽少陰厥陰經苦能下洩故善降兼辛故善散故
主欬逆上氣喉痺咽痛不得消息散結氣胸中邪逆
既降且散益以微寒故主食飲大熱別錄又主老血

在心脾間欬唾言語氣臭散胸中熱氣甄權主疰氣
消瘀血主女人月閉日華子主消痰破癥結胸膈滿
腹脹氣喘疹癬寇宗奭主肺氣喉痺為佳潔古主胃
中癰瘡皆此意也丹溪主行太陰厥陰之積痰使結
核自消甚捷又治足厥陰濕氣下流因疲勞而發為
便毒悉取其洩熱散結之力耳故古方治喉痺咽痛
為要藥

主治叅互

仲景金匱方治欬逆上氣喉中作水雞聲射干麻黃

湯 入鼈甲煎丸治瘧母 袖珍方治咽喉腫痛用

生射干猪脂各四兩合煎令焦去滓每噙棗許即瘥

醫方大成治喉痺不通用扁竹新根搗汁嚥之大

腸動即解或醋研汁噙引涎出亦妙 便民方亦治

喉痺不通用紫蝴蝶根一錢黃芩生甘草桔梗各五

分為末水調頓服立愈名奪命散 永類鈴方治乳

癰初腫用扁竹根如僵蠶者同萱草根為末蜜調敷

之神效 孫真人千金方治喉痺有烏翬膏

簡誤

射干雖能降手少陽厥陰相火洩熱散結消腫痛然無益陰之性故別錄云久服令人虛凡脾胃薄弱臟寒氣血虛人病無實熱者禁用

常山味苦辛寒微寒有毒主傷寒寒熱發溫瘧鬼毒胸中痰結吐逆療鬼蠱往來水脹灑灑惡寒鼠瘻

畏玉
扎忌

菘菜

疏○常山稟天地陰寒之氣以生故其味苦寒別錄
桐君益之以辛宜其有毒也苦泄辛散故善逐飲陰
寒祛熱故善破瘴癘入口即吐其性暴悍又可知已
本經主傷寒寒熱宜作主山嵐瘴氣寒熱發為溫瘧
鬼毒胸中痰結古方治瘧多用蓋以嶺南西粵鬼方
咸多山嵐瘴癘之氣所感邪氣充於榮衛皮膚之間
欲去皮膚毛孔中瘴氣根本非常山不可以其性能
祛逐老痰積飲善散山嵐瘴癘之邪故也

主治叅互

治山嵐瘴氣作瘧百藥不効秘方常山四兩砂仁四兩檳榔二兩米醋浸入瓷器中二宿取出各炒燥為末雞子清和丸如菜豆大五更新汲水向東吞三五錢一服可止九月已後宜以酒吞 劉長春經驗方
治瘴瘧寒熱用常山一寸草果一枚熱酒一盞浸一宿五更向東飲之蓋卧酒醒即愈 肘後方治三十年老瘧及積年久瘧常山黃連各一兩酒三升漬一

宿以瓦釜煮取一升半發日早服五合發時再服熱
當吐冷當利無不瘥者

簡誤

常山陰毒之草也其性暴悍雖能破瘴癘遂積飲然
善損真氣故瘧非由於瘴氣及老痰積飲所致者勿
用經曰夏傷於暑秋必痃瘧又曰邪之所湊其氣必
虛暑邪乘虛客於五臟六腑十二經瘧亦因之而發
內經載之詳矣王好古分條立方殊得仲景遺意此

皆瘧之對病正藥也並不得妄用常山虛人真氣變
為危證戒之戒之清暑養胃健脾消痰乃治瘧之正
法稍久則當分氣血施補助靡不愈者又安所事常

山乎

甘遂味苦甘寒大寒有毒主大腹疝瘕腹痛面目浮腫
留飲宿食破癥堅積聚利水穀道下五水散膀胱留熱

皮中痞熱氣腫滿

瓜蒂為之使惡
遠志反甘草

疏○甘遂稟天地陰寒之氣以生故其味苦其氣寒

而有毒亦陰草也水屬陰各從其類故善逐水其主
大腹者即世所謂水蠱也又主疝瘕腹滿面目浮腫
及留飲利水道穀道下五水散膀胱留熱皮中痞氣
腫滿者謂諸病皆從水濕所生水去飲消濕除是拔
其本也潔古謂其味苦性寒苦性泄寒勝熱直達水
氣所結之處乃泄水之聖藥水結胸非此不能除故
仲景大陷胸湯用之但有毒不可輕用其性之惡可
槩見已其根皮赤肉白作連珠實重者良

主治叅互

入陷胸湯治傷寒水結胸有神 聖濟總錄治膜外
水氣甘遂末大麥麩各半兩水和作餅燒熟食之取
利 肘後方治身面洪腫甘遂末二錢以雄猪腰子
一枚分作七片入末在內濕紙包煨令熟每日服一
片至四五服當覺腹鳴小便利是其效也 張仲景
金匱玉函方治心下留飲堅滿脈伏其人欲自利反
快甘遂半夏湯用甘遂大者三枚半夏十二枚以水

一升煮半升入芍藥五枚水二升煮半升去滓以蜜
半升同煎至八合頓服之 筆峰雜興方治小便轉
脬甘遂末一錢猪苓湯調下立通 秘方治體氣甘
遂末一錢同猪肉煮食於野地中掘一坑令患人至
彼處向上風站立以甘草末唾調入臍內須臾腹中
作響取利下黑汁亟從上風奔回可絕不絕再作一
服仍前用之

簡誤

甘遂性陰毒雖善下水除濕然能耗損真氣虧竭津液元氣虛人除傷寒水結胸不得不用外其餘水腫鼓脹類多脾陰不足土虛不能制水以致水氣泛濫即劉河間云諸濕腫滿屬脾土法應補脾實土兼利小便不此之圖而反用甘遂下之是重虛其虛也水既暫去復腫必死矣必察病屬濕熱有飲有水而元氣尚壯之人乃可一施耳不然禍不旋踵矣戒之戒之慎之慎之

白斂味苦甘平微寒無毒主癰腫疽瘡散結氣止痛除熱目中赤小兒驚癇溫瘧女子陰中腫痛下赤白殺火

毒

反烏頭

疏○白斂得金氣故味苦平平應作辛別錄兼甘其氣微寒無毒苦則泄辛則散甘則緩寒則除熱故主癰腫疽瘡散結止痛蓋以癰疽皆由榮氣不從逆於肉裏所致女子陰中腫痛亦由血分有熱之故火毒傷肌肉即血分有熱目中赤亦血熱為病散結涼血

除熱則上來諸苦茂不濟矣其治小兒驚癇溫瘧及婦人下赤白則雖云驚癇屬風熱溫瘧由於暑赤白淋屬濕熱或可通用然病各有因藥各有主以類推之恐非其任矣尚俟後哲詳之總之為疔腫癰疽家要藥乃確論也

主治參互

白斂得白及紅藥子加硃砂雄黃乳沒腦麝為傳癰疽止痛散毒之上藥 肘後方治發背初起水調白

斂末傅之 聖惠方治疔瘡初起同上 陶隱居治

一切癰腫白斂赤小豆茜草為末雞子白調塗之又

方白斂二分藜蘆一分為末酒和貼之日三上 御

藥院方治面鼻酒皰白斂白石脂杏仁各半兩為末

雞子調塗日一洗 肘後方治面生粉刺白斂二分

杏仁半分雞屎白一分為末蜜和雜水拭面 談野

翁治凍耳成瘡白斂黃檗等分為末生油調搽 外

臺方治湯火灼爛白斂末傅之 聖惠方治鐵刺諸

哽及竹木哽在咽中白斂半夏泡等分為末酒服半錢日二服又治刺在肉中方同上 千金方治風痺筋急腫痛屈轉異常處白斂二分熟附子一分為末每酒服半刀圭日二服以身中熱行為候十日便覺忌猪肉冷水 瑞竹堂方治諸瘡不斂口白斂赤斂黃檗各三錢炒研輕粉一錢用葱白漿水洗淨傅之

簡誤

癰疽已潰不宜服

白及味苦辛平微寒無毒主癰腫惡瘡敗疽傷陰死肌

胃中邪氣賊風鬼擊痲緩不收除白癬疥蟲

紫石英為之使惡理

石畏李核杏

仁反烏頭

疏○白及本經味苦平別錄加辛微寒李當之大寒

日華子加甘東垣亦微寒謂其性潛陽中之陰收也

辛為金味收為金氣其為得季秋之氣而兼金水之

性者哉宜乎入肺理傷有奇効矣苦能洩熱辛能散

結癰疽皆由榮氣不從逆於肉裏所生敗疽傷陰死

肌皆熱壅血瘀所致故悉主之也胃中邪氣者即邪熱也賊風鬼擊痲緩不收皆血分有熱濕熱傷陰之所生也入血分以洩熱散結逐腐則諸證靡不瘳矣

主治叅互

白及性濇破散中有收斂蓋去腐逐瘀以生新之藥也得白飲紅藥子加腦麝乳沒治一切癰疽腫毒止痛散結排膿有神一味為細末米飲調三錢服治損肺吐血有奇効經驗方治鼻衄不止津調白及

末塗山根上仍以水服一錢立止 袖珍方治疔瘡
腫毒白及末半錢以水澄之去水攤於厚紙上貼之
永類鈴方治打跌骨折酒調白及末二錢服其功
不減於自然銅古銖錢也 濟急方治手足皸裂白
及末水調塞之勿犯水 趙真人方治湯火傷灼白
及末油調傅之

簡誤

癰疽已潰不宜同苦寒藥服

大戟味苦甘寒大寒有小毒主蠱毒十二水腫滿急痛積聚中風皮膚疼痛吐逆頸腋癰腫頭痛發汗利大小

腸反甘草畏菖蒲蘆草鼠糞

疏○大戟稟天地陰毒之氣以生故味苦寒而有小毒甄權潔古兼辛別錄兼甘應是辛多非辛則無毒矣苦寒故善下走而入腎肝辛則橫走無所不到矣潔古又謂瀉肺損真氣其主下蠱毒者以蠱毒必熱必辛辛則散走臟腑故假其辛寒以搜其辛熱是以

毒攻毒也苦寒下洩故能逐諸有餘之水濕熱及留
飲在中下二焦則為腹滿急痛或成積聚苦辛甘寒
故散頸腋癰腫利大小便瀉毒藥通月水陰草苦辛
有毒故又墮胎也天行黃病非元氣實者勿用經曰
邪之所湊其氣必虛中風之人其虛必矣本經末又
謂其主中風皮膚疼痛吐逆者非也焉有虛病而可
施苦寒有毒下泄之藥哉是重虛其虛也

主治參互

大戟入玉樞丹紫金錠則解蠱毒熱毒癰疽疔腫及
蛇蟲諸毒內服外敷取利為度 百祥丸治痘瘡變
黑乾陷不發寒而大便閉結者用大戟一兩棗三枚
水一碗同煮曝乾去大戟以棗肉焙丸服從三分服
至五分以利為度 三因方控涎丹治痰涎畱在胸
膈上下變為諸病或頸項胸背腰脅手足膝髀隱痛
不可忍筋骨牽引釣痛走易及皮膚麻痺似乎癱瘓
不可誤作風氣風毒及瘡疽施治又治頭痛不可舉

或睡中流涎或欬唾喘息或痰迷心竅並宜此藥數服痰涎自失諸疾尋愈紫大戟白甘遂白芥子微炒各一兩為末薑汁打麩糊丸梧子大每服七丸或二十九丸以津液嚥下若取利則服五六十丸 千金方中風發熱大戟苦參各四兩白酢漿一斗煮熟洗之寒乃止 生生方牙齒搖痛大戟咬於痛處良

簡誤

大戟陰寒善走而下洩潔古謂其損真氣故凡水腫

不由於受濕停水而由於脾虛土堅則水清土虛則水泛濫實脾則能制水此必然之數也今不補脾而復用疏洩追逐之藥是重虛其虛也宜詳辨而深戒之惟畱飲伏飲停滯中焦及元氣壯實人患水濕乃可一暫施耳

貫衆味苦微寒有毒主腹中邪熱氣諸毒殺三蟲去寸白破癥瘕除頭風止金瘡花療惡瘡令人洩

赤小豆為之使

疏○貫衆味苦而又微寒止應云有小毒以其苦寒

故主腹中邪熱氣諸毒三蟲皆由濕熱所生苦寒除
濕熱則三蟲自死矣苦以洩之亦兼有散之義故
破癥瘕苦寒能除風熱故止頭風金瘡出血後必發
熱洩熱散結則金瘡自止

主治參互

貫衆一味為細末水調一錢七治鼻衄有效 疫氣
發時以此藥置水中令人飲此水則不傳染

簡誤

病人虛寒無實熱者禁用

羊躑躅味辛溫有大毒主賊風在皮膚中淫淫痛溫瘡惡毒諸痺邪氣鬼疰蠱毒

疏○羊躑躅毒藥也然性能祛風寒濕故可以治惡痺痺者風寒濕所成也然非元氣未虛脾胃尚實之人不可用凡用此等毒藥亦須雜以安胃和氣血藥
同用

簡誤

躑躅性發散氣血虛人忌之不可近眼

神農本草經疏卷十

欽定四庫全書

神農本草經疏卷十一

明 繆希雍 撰

草部下品之下

總百五種今疏其要者三十五種

何首烏

威靈仙

牽牛子

蓖麻子

天南星

豨薟

馬鞭草

苧根

白頭翁

甘蕉根

蘆根

笋附

鬼白

馬兜鈴

根附

仙茅

劉寄奴

骨碎補

連翹

續隨子

山豆根

白附子

鹿藿

預知子

木賊

蒲公草

穀精草

夏枯草

山慈菘

燈心草

馬勃

水蓼

海金沙

草三稜

鹿藥

草石蠶

漆姑草

何首烏味苦澀微溫無毒主瘰癧消癰腫療頭面風瘡
五痔主心痛益血氣黑髭鬚悅顏色久服長筋骨益精
髓延年不老亦治婦人產後及帶下諸疾

茯苓為之使
與白朮龍相

惡犯之令人
髭髮早白

疏○何首烏本文味苦澀微溫傳言味甘氣溫其稟
春深生氣無疑春為木化入通於肝外合於風升也
陽也入足厥陰兼入足少陰經故為益血祛風之上

藥雌雄二種遇夜則交有陰陽交合之象故能令人
有子肝主血腎主精益二經則精血盛髮者血之餘
也故烏髭鬢其主瘰癧者肝膽氣鬱結則內熱榮氣
壅逆發為是病十一臟皆取決於膽與肝為表裏為
少陽之經不可出入氣血俱少乃風木所主行膽氣
益肝血則瘰癧自消矣調榮氣則癰腫消治風先治
血血活則風散故療頭面風瘡腸澼為痔痔者濕熱
下流傷血分而無所施洩則逼近肛門肉分迸出成

形為種種矣風能勝濕濕熱解則痔將自平心血虛則內熱熱則心搖搖而作痛益血則熱解而痛除益血氣黑鬢鬢悅顏色久服長筋骨益精氣延年不老者皆補肝腎益精血之極功也亦治婦人產後及帶下諸疾者婦人以血為主月事通後厥陰主之帶下本於血虛而兼濕熱行濕益血靡不除矣

主治參互

君甘菊花枸杞子地黃牛膝天門冬赤白茯苓桑椹

南燭子則益精血烏鬚髮駐顏延年 得牛膝鼈甲

橘紅青皮治瘧邪在陰分久而不解如表氣已虛脾

胃已弱則加人參三五錢肺熱者去人參換入當歸

如其數 得刺蒺藜甘菊花天門冬胡麻仁漆葉白

芷荆芥穗苦參地黃百部治頭面諸風及大麻風

得金銀花地榆犀角草石蠶山豆根黃連芍藥乾葛

升麻甘草滑石治毒痢下純血諸藥不效有神 經

驗方治骨軟風腰膝疼行履不得遍身瘙痒何首烏

大而有花紋者同牛膝剉各一斤以好酒一升浸一宿曝乾於木臼內搗末蜜丸每日空心食前酒吞三五十九兼可治風痰久瘧不愈 斗門方治瘰癧或破或不破下至胸前者皆治之用何首烏根洗淨日日生嚼并取葉搗塗之數服即止其藥久服延年黑髮用之神效 何首烏傳何首烏味甘氣溫性則無毒茯苓為之使治五痔腰膝之病冷氣心痛積年勞瘦痰癖風虛敗劣長筋力益精髓壯氣駐顏黑髮延

年婦人惡血痿黃產後諸疾赤白帶下毒氣入腹久
痢不止其功不可具述一名野苗二名交藤三名夜
合四名地精五名首烏本出虔州江南諸道皆有之
苗葉有光澤者又如桃李葉雄者苗色黃白雌者黃
赤根遠不過三尺春秋可採日乾去皮為末酒下最
良有疾即用茯苓煎湯為使常杵末新瓦器盛用偶
日服之忌豬肉血無鱗魚觸藥無力其根形大如拳
連珠其有形如鳥獸山嶽之狀者珍也掘得去皮生

喫得味甘甜可休糧讚曰神妙勝道著在仙書雌雄
相交夜合晝疎服之去穀日居月諸返老還少變安
病軀有緣者遇勗爾自知明州刺史李遠傳錄云何
首烏所出順州南河縣及韶州潮州恩州賀州廣州
四會縣潘州者為上邕州桂州康州春州高州勒州
循州晉興縣出者次之真仙草也五十年者如拳大
號山奴服之一年鬢髮青黑一百年者如盃大號山
哥服之一年顏色紅悅一百五十年者如盆大號山

伯服之一年齒落更生二百年如斗栲栳大號山翁
服之一年顏如童子行及奔馬三百年者如三斗栲
栳大號山精純陽之體久服之成地仙也 衍義曰
何首烏兼黑髭鬚與蘿蔔相惡令人髭鬚早白治腸
風熱多用

簡誤

何首烏為益血之藥忌與天雄烏頭附子仙茅薑桂
等諸燥熱藥同用修事以苦竹刀切片米泔浸經宿

曝乾蒸用勿令犯鐵

威靈仙味苦溫無毒主諸風宣通五藏去腹內冷滯心
膈痰水久積癥瘕瘰癧氣塊膀胱宿膿惡水腰膝冷疼
及療折傷一名能消久服之無疫瘧忌茗

疏○威靈仙感春夏之氣故其味苦其氣溫其性無
毒升也陽也入足太陽經春為風木之化故主諸風
而為風藥之宣導善走者也腹內冷滯多由於寒濕
心膈痰水乃飲停於上中二焦也風能勝濕濕濕病喜

燥故主之也膀胱宿膿惡水靡不由濕所成腰膝冷
疼亦緣濕流下部侵筋致之祛風除濕病隨去矣其
曰久積癥瘕瘰癧氣塊及折傷則病干血分者多氣
分者少而又未必皆由於濕施之恐亦無當取節焉
可也

主治參互

簡便方治脚氣入腹脹悶喘急用末二錢酒下痛減
一分則藥亦減一分 千金方治腰脚諸痛用末空

心溫酒服一錢逐日以微利為度 集驗方治腎臟
風壅腰膝沉重用威靈仙末蜜丸梧子大溫酒吞八
十九平明微利惡物如青膿膠即是風毒積滯如未
利再服百丸取下後食粥補之一月仍常服溫補藥
孫兆方名放杖丸 衛生易簡方治破傷風威靈仙
半兩獨蒜一箇香油一錢同搗爛熱酒衝服汗出即
愈 又方治停痰宿飲喘欬嘔逆全不入食威靈仙
焙半夏薑汁浸焙為末用皂角水熬膏丸菴豆大每

服七丸至十九薑湯下日三服一月驗忌茶麪 又
方治諸骨鯁威靈仙一兩二錢縮砂蜜一兩沙糖一
盞水二鍾煎一鍾溫服 李樓怪證方治飛絲纏陰
腫痛欲斷以威靈仙搥汁浸洗效

簡誤

風藥性升而燥走而不守凡病非風濕及陽盛火升
血虛有熱表虛有汗疹瘡口渴身熱者並忌用之
牽牛子味苦寒有毒主下氣療脚滿水腫除風毒利小

便

疏○牽牛子本經不載乃名醫續註本草謂為苦寒有毒東垣以為感南方熱火之化所生應是辛熱有毒之藥其主下氣者乃損削真氣之謂療脚滿水腫除風毒利小便皆相似語況前病多屬脾胃氣虛此是瀉藥今反用之為害滋大

主治叅互

黑牽牛得白木香檳榔使君子能追蟲取積 普濟

方治氣築奔衝不可忍牛郎丸用黑牽牛半兩檳榔
二錢半為末每服一錢紫蘇湯下追蟲取積亦可用
摘玄方治面上風刺黑牽牛酒浸三宿為末先以
薑汁擦面後用藥塗之 聖惠方治面上粉刺癩子
如米粉黑牽牛末對入面粉藥中日日洗之

簡誤

牽牛子辛熱有毒之藥性又迅急其所主治多是脾
胃與肺家濕熱之病理應屬虛何資瀉藥況諸證應

用藥物尋檢本經所載良藥不之何至舍其萬全而
就不可必不可保之毒物哉宜東垣之諄復其辭以
戒後人之勿輕用也茲并附錄其論以詔後世云

附錄東垣云牽牛非神農藥也名醫續註云味苦寒
能除濕氣利小便治下注脚氣此說氣味主治俱誤
矣何也凡用牽牛少則動大便多則泄下如水乃瀉
氣之藥其味辛辣久嚼猛烈雄壯所謂苦寒安在哉
夫濕者水之別稱有形者也若肺先受濕濕氣不得

施化致大小便不通則宜暫用之蓋牽牛感南方熱火之化所生火能平金而泄肺濕去則氣得周流所謂五臟有邪更相平也今不問有濕無濕但傷食或有熱證俱用牽牛尅伐之藥豈不誤哉況牽牛止能泄氣中之濕熱不能除血中之濕熱濕從下受之下焦主血血中之濕宜苦寒之味反以辛藥泄之傷人元氣且牽牛辛烈比之諸辛藥泄氣尤甚其傷人必矣經云辛泄氣辛走氣辛泄肺肺病者無多食辛況

飲食失節勞役所傷是胃氣不行心火乘之腸胃受
火邪名曰熱中脾胃主血當血中泄火以黃芩之苦
寒泄火當歸身之辛溫血生地黃之苦寒涼血益
血少加紅花之辛溫以泄血絡桃仁之辛溫除燥潤
腸仍不可專用須於補中益氣泄陰火之藥內加而
用之何則上焦元氣已自虛弱若反用牽牛大辛熱
氣味俱陽之藥以泄水泄元氣利其小便竭其津液
是謂重虛重則必死輕則天人故張文懿云牽牛不

可耽嗜脫人元氣見人有酒食病痞者多服牽牛丸散取快一時藥過仍痞隨服隨效效後復痞以致久服脫人元氣猶不知悔也張仲景治七種濕熱小便不利無一藥犯牽牛者仲景豈不知牽牛能泄濕利小便乎為濕病之根在下焦是血分中氣病不可用辛辣之藥泄上焦太陰之氣是血病瀉氣使氣血俱損也經云毋實實毋虛虛毋絕人長命此之謂也用者戒之 牽牛自宋以後北人常用取快及劉守真

張子和出又倡為通用下藥李明之目擊其事故著
此說極力闢之牽牛治水氣在肺喘滿腫脹下焦鬱
遏腰背脹重及大腸風秘氣秘卓有殊功但病在血
分及脾胃虛弱而痞滿者則不可取快一時及常服
暗傷元氣也

蓖麻子味甘辛平有小毒主水癥水研二十枚服之吐
惡沫加至三十枚三日一服差則止又主風虛寒熱身
體瘡痒浮腫尸疰惡氣榨取油塗之 葉主脚氣風腫

不仁搗蒸傅之

疏○蓖麻得土金之氣故其味甘辛而其氣則平性
有小毒其力長於收吸故能拔病氣出外其性善收
故能追膿取毒能出有形之滯物又能通利關節故
主水癥又主風虛寒熱身體瘡痒浮腫尸疰惡氣榨
取油塗之研塗手足心催生寇氏主癩癰李氏主偏
風半身不遂口眼喎斜頭風脚氣毒腫丹瘤火傷鍼
刺入肉女人胞衣不下及子腸挺出皆從外治不經

內服良有見也子無刺者良子有刺者毒

雷公云凡使勿用黑天赤利子緣在地蔞上是顆兩頭尖有毒其蓖麻子節節有黃黑斑凡使以鹽湯煮半日去皮取子研用

時珍云取蓖麻油法用蓖麻仁五升搗爛以水一斗煮之沫浮於湯面即撇起待沫盡乃止去水以沫煎至點燈不炸滴水不散為度

李氏曰凡服蓖麻子者一生不得食豆犯之必脹死

其油能伏丹砂輕粉

主治叅互

蓖麻子去殼同紫背天葵等分清水入砂器中煮半
日空腹時與病人嚼下自十五枚至廿一枚瘰癧久
久自消 李氏云一人病偏風手足不舉用此油同
羊脂麝香鯨鯉甲等藥煎作摩膏日摩數次一月餘
漸復兼服搜風養血化痰之劑三月而愈又一人病
手臂一塊腫痛亦用蓖麻搗膏貼之一夜而愈又一

人病氣鬱偏頭痛用此同乳香食鹽搗煖太陽穴一
夜痛止又一婦產後子腸不收搗仁貼其丹田一夜
而上此藥外用累奏奇功但內服不可輕率耳或言
搗膏以筋點於鵝馬六畜舌根下即不能食或點肛
內即下血死其毒可知矣 又方治口眼喎斜蓖麻
子仁搗膏左貼右右貼左即正 又婦人良方亦治
前證用蓖麻子仁七七粒研作餅右喎安在左手心
左喎安在右手心却以銅盃盛熱水坐藥上冷即換

五六次即正也 治風氣頭痛不可忍者乳香蓖麻
仁等分搗餅隨左右貼太陽穴解髮出氣甚驗 又
方蓖麻仁半兩棗肉十五枚搗塗紙上捲筒插入鼻
中下清水涕頭痛即止 聖濟錄治鼻塞不通用蓖
麻仁三十粒大棗去皮一枚搗勻綿裹塞之一日一
易三十日聞香臭也 摘玄方治舌上出血用蓖麻
子油紙攪燒煙熏鼻中自止 經驗良方治舌脹塞
口用蓖麻子仁四十粒去殼研油塗紙上作攪燒煙

熏之未退再熏以愈為度有人舌腫出口外一村人
用此法而愈 治急喉痺牙關緊急不通用此即破
以蓖麻子仁研爛紙卷作筒燒煙熏吸即通或只取
油作撚尤妙名聖煙筒 崔元亮海上集驗方治催
生下胞用蓖麻子七粒去殼研膏塗腳心若胎及衣
下便速洗去不爾則子腸出即以此膏塗頂腸自入
也 肘後方產難取蓖麻子十四枚每手各把七枚
須臾立下也 摘玄治子宮脫下用蓖麻仁枯礬等

分為末安紙上托入仍以蓖麻仁十四枚研膏塗頂
心即入 又治盤腸生產塗頂方同上 肘後方治
一切腫毒痛不可忍用蓖麻子搥敷即止也

簡誤

蓖麻子能吸氣又能通竅體質多油而又有毒脾胃
薄弱大腸不固之人慎勿輕用服餌

天南星味苦辛有毒主中風除痰麻痺下氣破堅積消

癰腫利胸膈散血墮胎

畏附子乾
薑生薑

疏○南星得火金之氣故其味苦辛火金相搏故性烈而有毒陰中之陽可升可降入手太陰經為風寒鬱於肺家以致風痰壅盛之要藥也炎上作苦苦則善燥從革作辛辛則善散溫則開通故主麻痺下氣破堅積消癰腫利胸膈散血墮胎

主治參互

南星得牛膽則燥氣減得火炮則毒性緩 得薑桂附主破傷風口噤身強 得牛膽皂角川烏茯苓神牛

黃天竺黃丹砂治驚癇加天麻治一切風痰壅盛

同半夏搗細末入降真香末傅金瘡折傷瘀血 同

桂枝乾薑甘草細辛治西北邊人真中風風痰猝壅

僵仆

簡誤

南星味既辛苦氣復大溫而燥烈正與半夏之性同而毒則過之故亦善墮胎也半夏治濕痰多南星主風痰多是其異矣二藥大都相類故其所忌亦同非

西北人真中風者勿用詳載半夏條下茲不重出

豨薟味苦寒有小毒主熱蠱煩滿不能食生搗汁服三

四合多則令人吐

疏○豨薟陽草也感少陽生發之氣以生故其味苦寒不應有毒乃入血分祛風除濕兼活血之要藥也濕熱盛則生蠱濕則煩滿不能食春生之藥本合風化風能勝濕苦寒除熱故主之也經曰地之濕氣感則害人皮肉筋脈故蘇頌治肝腎風氣四肢麻痺骨

間疼痛腰膝無力及行大腸氣成訥用以療中風張
詠用以輕身駐顏效已著於曩代功復見於今時妙
在走而不洩香可開脾邪去身安功力斯倍矣

主治參互

猓菴如法修事一斤入漆葉四兩亦以蜜酒潤過九
蒸九曬蜜和丸如梧子大每五錢空心饑時白湯吞
日三服治紫雲風爛麻風有神 江陵府節度使成
訥進猓菴丸方表畧云臣有弟訥年三十一中風伏

枕五年百醫不差有道人鍾針者因覩此患曰可餌
狶簽丸必愈其藥多生沃壤高三尺許節葉相對其
葉當夏五月已來收每去地五寸翦刈以溫水洗去
泥土摘其葉及枝頭凡九蒸九曝不必太燥但取蒸
足數為度仍熬搗為末煉蜜丸如梧子大空心溫酒
或米飲下二三十丸服至二千丸所患愈加不得憂
慮是藥攻之力服至四千丸必得復故五千丸當復
丁壯臣依法修合令訢服之果如其言鍾針又言此

藥與本草所述功效相異蓋出處盛在江東彼土人呼猪苓緣此藥如猪苓氣故以為名但經蒸曝苓氣自泯每當服後須喫飯三五匙壓之五月五日采者佳奉敕宣付醫院詳錄 知益州張詠進猪苓丸表

畧云此草金稜銀線素

應是赤字

莖紫莖對節而生蜀號

火杓莖葉頗同蒼耳誰知至賤之中乃有殊常之效臣自喫至百服眼目清明積至千服鬚鬚烏黑筋力輕健效驗多端臣本州有都押衙羅守一曾因中風

墜馬失音不語臣與十服其病立瘥又和尚知嚴年七十忽患偏風口眼喎斜時時吐涎臣與十服亦便得瘥今合一百劑差職員史元奏進

簡誤

凡病人患四肢麻痺骨間疼腰膝無力由於脾腎兩虛陰血不足不因風濕所中而得者不宜服之予少年時晤金壇令公劉蓉川論及此藥劉太夫人平居常服在金壇令隸卒取此草太夫人見之輒曰非是

乃知張益公表中所云金陵銀線素莖紫萼與吳地所產者有異物隨土變固其性也

馬鞭草主下部蠱瘡

疏○馬鞭草圖經謂之龍牙別錄味苦氣寒無毒保昇日華子咸謂辛涼應有之也本是涼血破血之藥下部蠱瘡者血熱之極兼之濕熱故血污濁而成瘡且有蟲也血涼熱解污濁者破而行之靡不瘥矣陳藏器謂其破血殺蟲亦此意耳

主治叅互

集驗方治男子陰腫大如升核痛人所不能治者馬鞭草搗塗之 太平聖惠方治白癩風用馬鞭草為

末每服一錢食前荆芥薄荷湯下日三服忌鐵 蕭

炳集驗方治人疥馬疥馬鞭草搗自然汁半盞飲盡十日內愈神效 醫方摘要治赤白下痢龍牙草五

錢陳茶一撮煎服神效 陳嘉謨本草蒙筌治楊梅

惡瘡馬鞭草煎湯先熏後洗氣到便爽毒腫隨減

簡誤

病人雖有濕熱血熱證脾陰虛而胃氣弱者勿服

苧根寒主小兒赤丹其漬苧汁療渴

疏○苧根得土之沖氣而兼陰寒故味甘氣寒而無
毒別錄專主小兒赤丹為其寒能涼血也漬苧汁療
渴者除熱之功也日華子用以治心膈熱漏胎下血
胎前產後心煩天行熱疾大渴發狂及服金石藥人
心熱罇毒箭蛇蟲咬皆以其性寒能解熱涼血故也

主治叅互

同生地黄汁能涼血安胎 聖惠方治小便血淋苧

根煎湯頻服大妙亦治諸淋 斗門方治五種淋疾

苧根兩莖打碎以水一碗半煎半碗頓服即通 梅

師方治妊娠胎動忽下黃汁如膠或如小豆汁腹痛

不可忍者苧根去黑皮切二升以銀一斤水九升煎

四升每服入酒半升或一升分作二服聖惠方同

瀕湖集簡方治肛門腫痛生苧根搗爛坐之良 聖

惠方治脫肛不收苧根搗爛煎湯熏洗之 外臺秘
要治五色丹毒苧根煮濃汁日三浴之

簡誤

病人胃弱泄瀉者勿服諸病不由血熱者亦不宜用
白頭翁味苦溫無毒主溫瘧狂易羊音寒熱癥瘕積聚癭
氣逐血止痛療金瘡鼻衄

疏○白頭翁本經味苦溫無毒吳綬益以辛寒詳其
所主似為得之東垣謂其氣厚味薄既能入血主血

應云氣味俱厚可升可降陰中陽也入手足陽明經
血分暑伏足陽明經則發溫瘧伏手陽明經則病毒
痢滯下純血狂易鼻衄者血熱也寒熱者血瘀也癥
瘕積聚癭氣靡不由血凝而成積滯停畱則腹痛金
瘡血涼則痛自止苦能下泄辛能解散寒能除熱涼
血具諸功能故悉主之殆散熱涼血行瘀之要藥歟
前人所謂腎欲堅急食苦以堅之痢則下焦虛故以
純苦之劑堅之男子陰疝偏墜小兒頭禿腥羶鼻衄

無此不效毒痢有此獲功熱毒下痢紫血鮮血者宜
之

主治參互

仲景金匱玉函方白頭翁湯治熱痢下重用白頭翁
二兩黃連黃檗秦皮各三兩水七升煎二升每服一
升不愈更服婦人產後痢虛極者加甘草阿膠各二
兩 聖惠方治下痢咽腫春夏病此宜用白頭翁黃
連各一兩木香半兩水五升煎一升半分三服 外

臺秘要治陰癩偏腫用根生搗傅腫處一宿當作瘡
廿日愈 衛生方治外痔腫痛用白頭翁草一名野
丈人以根搗塗之逐血止痛 肘後方治小兒禿瘡
白頭翁根搗傅一宿作瘡半月愈

簡誤

白頭翁苦寒滯下胃虛不思食及下利完穀不化泄
瀉由於虛寒寒濕而不由於濕毒者忌之

甘焦根大寒主癰腫結熱

疏○甘焦稟地中至陰之氣以生其味應甘氣大寒性無毒入足陽明經膏粱之變發為癰腫甘寒解陽明之結熱則癰腫自除蘇恭搗傳癰腫去熱毒搗汁服治產後血脹悶大明治天行熱狂煩悶消渴患癰毒并金石發動燥熱口乾竝絞汁服之又治頭風遊風等證皆取其甘寒涼血除熱之功也

主治叅互

肘後方發背欲死芭焦根搗爛傅之 子母秘錄小

兒赤遊行於上下至心即死搗芭焦汁煎塗之 聖

惠方血淋澀痛芭焦根旱蓮草各等分水煎服日二

簡誤

焦性大寒癰腫陰證不掀腫不發熱者忌之天行病
非陽明熱甚者忌之產後血脹悶當以行血補血為
主焦雖味甘然性大寒尤非所宜

蘆根味甘寒無毒主消渴客熱止小便利

逆水者良蘇
恭療反胃嘔

逆不下食胃中熱傷食內熱 甄權解大熱開胃治
噎噦不止 大明主時疾煩悶瀉利人渴孕婦心熱

疏○蘆根稟土之沖氣而有水之陰氣故味甘氣寒而無毒消渴者中焦有熱則脾胃乾燥津液不生而然也甘能益胃和中寒能除熱降火熱解胃和則津液流通而渴止矣客熱者邪熱也甘寒除邪熱則客熱自解肺為水之上源脾氣散精上歸於肺始能通調水道下輸膀胱腎為水臟而主二便三家有熱則小便頻數甚至不能少忍火性急速故也肺腎脾三家之熱解則小便復其常道矣火升胃熱則反胃嘔

逆不下食及噎噦不止傷寒時疾熱甚則煩悶下多
亡陰故瀉利人多渴孕婦血不足則心熱甘寒除熱
安胃亦能下氣故悉主之也

筍亦能除熱利小便解河魀魚蟹毒

主治叅互

逆水蘆根得竹茹枇杷葉麥門冬烏梅木瓜能止因
熱嘔吐 得竹茹麥門冬大青青黛能除傷寒熱病
煩悶嘔吐藥性論云蘆根能解大熱開胃治噎噦不

止皆由甘寒除熱之力也 外臺秘要治骨蒸肺痿

不能食者蘇遊蘆根飲主之蘆根麥門冬地骨皮生

薑各十兩橘皮茯苓各五兩水二斗煮八升去滓分

五服取汗乃瘥 肘後方治勞復食復欲死竝以蘆

根煮濃汁飲 又方治嘔噦不止厥逆者蘆根三斤

切水煮濃汁頻飲二升必效若以童子小便煮服不

過三升愈 金匱玉函方治五噎吐逆心膈氣滯煩

悶不下食蘆根五兩剉以水三大盞煎取二盞溫服

千金方治反胃上氣蘆根茅根各二兩水四升煮
二升分服 太平聖惠方治霍亂煩悶蘆根三兩麥
門冬一兩煎服 梅師方治食狗肉中毒心下堅或
腹脹口乾忽發熱妄語蘆根煮汁服又聖惠方治中
馬肉毒千金方治鮓鱖魚毒并食蟹中毒方俱同

簡誤

因寒霍亂作脹因寒嘔吐勿服

鬼臼味辛溫微溫有毒主殺蠱毒鬼疰精物辟惡氣不

祥逐邪解百毒療欬喉結風邪煩惑失魂妄見去目中膚翳殺大毒不入湯

疏○鬼曰得地之金氣而性復陰沉是以辛溫有毒乃陰草中之散結辟邪者也故能入陰分以辟不祥及諸蠱毒鬼疰精物尸疰傳尸煩惑失魂妄見然此諸病何莫非陰邪尸鬼之所為凡物以類相從故惟陰草之異品乃能治乎陰鬼之賊害也其去目中膚翳及欬喉喉結風邪則辛散之功耳其藥有二種味

甘者勝苦者稍劣

主治叅互

鬼臼得丹砂雄黃雲母生犀角丹參遠志射干百部
菖蒲天門冬能治一切怪惑不祥及諸尸疰傳尸陰
邪為祟諸異證 婦人良方治子死腹中胞破不生
用鬼臼不拘多少黃者去毛為細末不用篩籬只搥
之如粉為度每服一錢無灰酒一盞同煎八分通口
服立生如神名一字散 千金方治射工中人寒熱

發瘡鬼白葉一把苦酒漬搗取汁服一升日二次

三十六黃方治黑黃急病其證面黑黃身如土色不
妨食脈沉若青脈入口者死宜烙口中黑脈耳會玉
泉章門心俞用生鬼白搗汁一小盞服乾者為末水
服

簡誤

凡病屬陽陽盛熱極有似鬼魅為祟及煩惑失魂妄
見者不可用

馬兜鈴味苦寒無毒主肺熱欬嗽痰結喘促血痔瘻瘡
疏○馬兜鈴感冬氣而生故味苦氣寒而無毒亦應
有辛兼金氣也入手太陰經苦善下洩辛則善散寒
能除熱其性輕揚厥狀類肺故能入肺除熱而使氣
下降欬嗽者氣升之病也氣降熱除嗽自平矣痰結
喘促亦肺熱病也宜并主之血痔瘻瘡無非血熱況
痔病屬大腸大腸與肺為表裏清臟熱則腑熱亦清
矣故亦主之甄權用以治肺氣上急坐息不得欬逆

連連不止潔古用以清肺氣補肺去肺中濕熱者皆
除熱降氣散結之力也

獨行根一名青木香治鬼疰積聚諸毒熱腫蛇毒水
磨為泥封之日三四易立瘥水煮一二兩取汁服吐
蠱毒又搗末水調塗丁腫大效

主治叅互

馬兜鈴得桑根白皮百部天門冬桔梗蘇子枇杷葉
貝母紫菀能治一切喘嗽 聖惠方治五種蠱毒馬

兜鈴根三兩為末分為三貼以水一盞煎五分去滓
頓服當吐蠱出未快再服以快為度 又方草蠱術
在西涼之西及嶺南人中此毒入咽刺痛欲死者用
馬兜鈴苗一兩為末以溫水調下一錢匕即消化蠱
出神效 外臺秘要解蛇蠱毒飲食中得之咽中如
有物嚙不下吐不出心下熱悶馬兜鈴一兩煎服即
吐出又服麝香一錢匕即吐蠱毒盡 簡要濟衆治
肺氣喘嗽馬兜鈴二兩酥炒甘草一兩水炙為末每

服一錢水煎溫呷或以藥末含嚥津亦得 雷公云
凡采得實去葉及蔓用生絹袋盛於東屋角畔懸令
乾劈作片取向裏子去革膜取淨子焙用

簡誤

肺虛寒作欬嗽或寒痰作喘者勿服

仙茅味辛溫有毒主心腹冷氣不能食腰脚風冷攣痺
不能行丈夫虛勞老人失溺無子益陽道久服通神強
記助筋骨益肌膚長精神明目

疏○仙茅稟火金之氣然必是火勝金微雖云辛溫
其實辛熱有毒之藥也氣味俱厚可升可降陰中陽
也入手足厥陰經命門真陽之火即先天祖氣天非
此火不能生物人非此火不能有生故真火一衰則
虛勞無子陽道痿弱老人失溺風冷外侵為腰脚不
利攣痺不能行并不能生土以致脾虛腹冷不能食
此藥味辛氣熱正入命門補火之不足則諸證自除
筋骨自利皮膚自益也命門之系上通於心相火得

補則君火益自振攝故久服能通神強記也長精神
明目者言真陽足陰翳消肝腎俱補之極功耳

主治叅互

聖濟總錄仙茅丸壯筋骨益精神明目黑鬚仙茅
二斤糯米泔浸五日去赤水夏月浸三日銅刀刮剉
陰乾取一斤枸杞子一斤車前子十二兩白茯苓去
皮茴香炒柏子仁去殼各八兩生地黃焙熟地黃焙
各四兩為末酒煮糊丸如梧子大每服五十九食前

溫酒下日二服

簡誤

凡味之毒者必辛氣之毒者必熱仙茅味辛氣大熱
其為毒可知矣雖能補命門益陽道助筋骨除風痺
然而病因不同寒熱迥別施之一悞禍如反掌況世
之人火旺致病者十居八九火衰成疾者百無二三
辛溫大熱之藥其可常御乎凡一概陰虛發熱欬嗽
吐血衄血齒血溺血血淋遺精白濁夢與鬼交腎虛

腰痛脚膝無力虛火上炎口乾咽痛失志陽痿水涸
精竭不能孕育老人孤陽無陰遺溺失精血虛不能
養筋以致偏枯痿痺胃家邪熱不能殺穀胃家虛火
嘈雜易饑三消五疸陰虛內熱外寒陽厥火極似水
等證法竝禁用

劉寄奴草味苦溫無毒主破血下脹多服令人痢

疏○劉寄奴草其味苦其氣溫揉之有香氣故應兼
辛苦能降下辛溫通行血得熱則行故能主破血下

脹然善走之性又在血分故多服則令人痢矣昔人謂為金瘡要藥又治產後餘疾下血止痛者正以其行血迅速故也

主治叅互

集簡方治大小便血劉寄奴為末茶調空心服二錢即止 千金方治折傷瘀血在腹內者劉寄奴骨碎補延胡索各一兩水二升煎七合入酒及童子小便各一合頓溫服 本事方治湯火灼傷劉寄奴搗末

先以糯米漿雞翎掃上後乃摻末竝不痛亦無痕大
驗此方凡湯火傷先以鹽末摻之護肉不壞後乃摻
藥為妙 聖惠方治風入瘡口腫痛劉寄奴為末摻
之即止

簡誤

劉寄奴草通行走散之性專入血分病人氣血虛脾
胃弱易作泄者勿服

骨碎補味苦溫無毒主破血止血補折傷

疏○骨碎補得金氣兼得石氣石者水之母也味苦
氣溫亦應有辛好生陰處故得陰氣為多宜其入足
少陰而主骨開耳入血行傷也開元命名其義可思
矣甄權用以主骨中毒氣風血疼痛五勞六極手足
不收上熱下冷雷公用以治耳鳴戴元禮用以治痢
風足痿軟皆入腎強骨之驗也

主治叅互

骨碎補得青鹽槐角炒研細擦牙能固齒 靈苑方

治虛氣攻牙齒痛血出或時痒痛骨碎補二兩銅刀
細剉瓦鍋慢火炒黑為末如常揩齒良久吐之嚙下
亦可劉松石云此方不獨治牙痛極能堅骨固牙益
精髓去骨中毒氣疼痛牙動將落者數擦立住再不
復動經用有神 聖濟總錄治風蟲牙痛骨碎補乳
香等分為末糊丸塞孔中名金針丸 蘇氏圖經治
耳鳴耳閉骨碎補削作細條火炮乘熱塞之 又方
病後髮落胡孫薑野薔薇嫩枝煎汁刷之 仁存方

治腸風失血胡孫薑燒存性五錢或酒或米飲服
時珍云骨碎補足少陰藥也故能入骨治牙及久泄
痢昔魏刺史子久泄諸醫不效垂殆用此藥末入猪
腎中煨熟與食頓住蓋腎主大小便久泄屬腎虛不
可專責脾胃也雷公用治耳鳴耳亦腎之竅也戴元
禮治痢後下虛不善調養或遠行或房勞或外感致
兩足痿軟或痛或痺遂成痢風宜用獨活寄生湯吞
虎骨四斤丸仍以骨碎補三分之一同研取汁酒和

服之外用杜牛膝杉木節草薺白芷南星煎湯頻頻
熏洗此亦從腎虛骨痿而治也 雷公云凡采得銅
刀刮去黃赤毛細切蜜拌蒸曝用

簡誤

不宜與風燥藥同用

連翹味苦平無毒主寒熱鼠瘻癰癧腫惡瘡癭瘤結
熱蠱毒去白蟲

疏○連翹感清涼之氣得金水之性本經雖云味苦

平無毒平應作辛乃為得之潔古謂其性涼味苦氣
味俱薄輕清而浮升也陽也海藏以為陰中陽也入
手足少陽手陽明經亦入手少陰心經其主寒熱鼠
瘻癰癧癭瘤結熱者以上來諸證皆從足少陽膽經
氣鬱有熱而成此藥正清膽經之熱其輕揚芬芳之
氣又足以解足少陽之鬱氣清其熱散其鬱靡不瘳
矣癰腫惡瘡無非榮氣壅遏衛氣鬱滯而成清涼以
除瘀熱芬芳輕揚以散鬱結則榮衛通和而瘡腫消

矣。蠱毒非熱非辛則不成熱。解則蠱自消。濕熱盛則生蟲。清其熱而苦能洩蟲得苦即伏。故去白蟲甄權用以通利五淋小便不通。除心家客熱。日華子用以通小腸排膿。治瘡癰止痛。通月經。東垣用以散諸經血結氣聚消腫。丹溪用以瀉心火除脾胃濕熱。及治中部血證。以為使海藏用以治氣秘火炎之耳。聾一皆清熱散結下氣燥濕之功也。

主治參互

得貝母白芷甘草金銀花玄參薄荷夏枯草白及能
消瘰癧加牡鼠糞人爪山豆根蒲公英消乳癰乳巖
簡便方治瘰癧結核連翹脂麻等分為末時時食
之 潔古治項邊馬刀屬少陽經連翹二斤瞿麥一
斤大黃三兩甘草半兩每用一兩煎食後熱服十餘
日後灸臨泣穴二七壯六十日決效 集驗方治痔
瘡腫痛連翹煎湯熏洗後以刀上飛過綠礬入麝香
貼之

簡誤

連翹清而無補之藥也癰疽已潰勿服火熱由於虛者勿服脾胃薄弱易於作泄者勿服

續隨子味辛溫有毒主婦人血結月閉癥瘕瘰癧瘀血蠱毒鬼疰心腹痛冷氣脹滿利大小腸除痰飲積聚下惡滯物莖中白汁剝人面皮去黧黯苗如大戟一名拒冬一名千金子

疏○續隨子味辛氣溫而其性有毒實攻擊剋伐之

藥也長於解蠱毒鬼疰以致腹痛脹滿攻積聚下惡滯物及散痰飲至於婦人月閉癥瘕疰癖瘀血大小腸不利諸病則各有成病之由當求其本而治不宜槩施蓋此藥之為用乃以毒攻毒之功也

主治參互

聖濟錄治小便不通臍腹脹痛不可忍用續隨子一兩鉛丹半兩同少蜜搗作團瓶盛埋陰處臘月至春末取出研蜜丸梧子大每服二三十丸木通湯下

又方治涎積癥塊續隨子三十枚膩粉二錢青黛炒
一錢研勻糯米飯丸芡子大每服一九打碎以大棗
一枚燒熟去皮核同嚼冷茶送下半夜後取下積聚
惡物為效 崔元亮海上方治蛇咬腫悶欲死用重
臺六分續隨仁七粒搗篩為散酒服方寸匕兼唾和
少許塗咬處立效 普濟方治黑子疣贅續隨子於
熟時塗之自落

簡誤

病人元氣虛脾胃弱大便不固者禁用

山豆根味甘寒無毒主解諸藥毒止痛消瘡腫毒人及馬急黃發熱欬殺小蟲生劔南山谷蔓如豆

疏○山豆根得土之沖氣而兼感冬寒之令以生故其味甘苦其氣寒其性無毒甘所以和毒寒所以除熱凡毒必熱必辛得清寒之味甘苦之味則諸毒自解譬大人盛德與物無競即陰毒忤害遇之不起矣故為解毒清熱之上藥凡痛必因於熱毒解熱散則

痛自止瘡腫自消人馬急黃乃血熱極所發故必發熱熱氣上熏則發欬諸蟲亦濕熱所化故悉主之而多獲竒效也

主治叅互

山豆根入散乳毒藥中能消乳巖 備急方解中蠱毒密取山豆根水研服少許未定再服已禁聲者亦愈 又方治五般急黃山豆根末水服二錢若帶蠱氣以酒下 又方治赤白滯下山豆根末蜜丸梧子

大每服二十九丸空腹白湯下三服當自止 又方治
頭風熱痛山豆根末油調塗兩太陽 又方治牙齦
腫痛山豆根一片含於痛所 永類方治喉癰山豆
根磨醋噙之追涎即愈勢重不能言者頻以雞翎掃
入喉中即引涎出立能言語 經驗方治麩豆諸瘡
煩熱甚者水研山豆根汁服少許 備急方治疥癬
山豆根末臘豬脂調塗 楊清叟外科治喉風急證
牙關緊閉水穀不入山豆根白藥子等分水煎噙之

嚥下二三口即愈

簡誤

病人虛寒者勿服

白附子主心痛血痺面上百病行藥勢

疏○白附子感陽氣而生故其味應辛微甘氣大溫
有小毒性燥而升風藥中之陽草也東垣謂其純陽
引藥勢上行是已其主心痛血痺者風寒之邪觸心
以致痰壅心經則作痛寒濕邪傷血分則成血痺風

能勝濕辛溫散寒故主之也風性升騰辛溫善散故能主面上百病而行藥勢也日華子用以治中風失音一切冷風氣面疝癩疵李珣用以治諸風冷氣足弱無力疥癬風瘡陰下濕痒頭面斑痕入面脂用丹溪用以治風痰皆祛風燥濕散結之功也

主治叅互

白附子得南星半夏能豁風痰暴壅而有寒邪者為要藥 同膽星全蝎白殭蠶釣藤天竺黃白檀香牛

黃能治小兒急驚 濟生方治痰厥頭痛同天麻半

夏南星等分生薑汁浸蒸餅丸菜豆大每服四十九

食後薑湯下 簡便方治赤白汗斑白附子硫黃等

分為末薑汁調稀茄蒂蘸擦日數次 衛生易簡方

治面上疥黧白附子為末卧時漿水洗面以白蜜和

塗紙上貼之久久自落

簡誤

白附子燥藥也似中風證雖痰壅禁用小兒慢驚不

宜服

鹿藿味苦平無毒主蠱毒女子腰腹痛不樂腸癰瘰癧
瘍氣

疏○鹿藿稟地中之陰氣以生故其味苦氣平無毒
入足陽明太陰厥陰經解毒涼血之藥也惟其解毒
故主蠱毒惟其涼血故主腸癰瘰癧瘍氣女人以血
為主血虛有熱則腰腹痛不樂得苦涼之氣則熱退
而血得所養故主女人腰腹痛不樂也方藥不復用

人亦罕識故不著叅互及簡誤

預知子味苦寒無毒殺蟲療蠱治諸毒傳云取二枚綴衣領上遇蠱毒物則聞其有聲當便知之有皮殼其實如皂莢子去皮研服之有效

疏○預知子感陰寒之氣以生故其味苦其氣寒其性無毒凡蠱毒多辛熱之物所造故宜苦寒以泄其熱毒熱毒既解則蠱不靈矣凡蟲皆濕熱所生蟲得苦則伏故殺蟲之藥多苦多寒也此草中之有靈性

者故其命名如此又名仙詔子聖知子聖先子蜀人
貴重云亦難得采無時其根味苦性極冷其效愈於
子山民目為聖無憂冬月采陰乾石曰內搗末篩細
凡中蠱毒則水煎三錢七溫服立已日華子又云盍
合子溫治一切風補五勞七傷其功不可備述并治
瘥癖氣塊天行溫疾消宿食止煩悶利小便催生解
毒藥中惡失音髮落傳一切蛇虫蠶咬

主治參互

和劑局方預知子丸治心氣不足精神恍惚言語錯
妄忪悸煩鬱憂愁慘憾善怒多恐健忘少睡夜多異
夢寤即驚魘或發狂眩暴不知人竝宜服此預知子
去皮白茯苓枸杞子石菖蒲茯神栢實人參地骨皮
遠志山藥黃精丹砂等分為末煉蜜丸芡實大每嚼
一九人參湯下 聖惠方治耳卒聾八月取石榴開
一孔畱蓋入米醋滿中蓋定麩裏煉火中煨熟取出
入仙詔子黑李子末取水滴耳中腦痛勿驚如此二

夜又點一耳

簡誤

預知子苦寒能利凡病人脾虛作泄瀉者勿服

木賊味甘微苦無毒主目疾退翳膜又消積塊益肝膽
明目療腸風止痢及婦人月水不斷得牛角腮麝香治
休息痢歷久不差得禹餘糧當歸芎藭療崩中赤白得
槐鵝桑耳腸風下血服之效又與槐子枳實相宜主痔
疾出血

疏○木賊草感春升之氣故應味甘微苦而性則無
毒入足厥陰少陽二經血分故首主目疾及退翳膜
益肝膽而明目也又療腸風止痢及婦人月水不斷
則消之中又有止之義矣其主積塊療腸風止痢及
婦人月水不斷崩中赤白痔疾出血者皆入血益肝
膽之功肝藏血故也

主治參互

木賊得穀精草決明子白蒺藜蟬蛻生地黃甘菊花

蜜蒙花治目疾久不愈消翳障有奇功 得槐角子
桑耳煨存性地榆茜草根治腸痔下血多效 廣利
方治瀉血不止木賊十二分切以水二升煎取八合
去滓空心溫二分服如人行五里再服 衍義云治
小腸膀胱氣木賊細剉微焙搗為末沸湯點二錢食
前服必效

簡誤

目疾由於怒氣及暑熱傷血暴赤腫痛者非其所任

蒲公英味甘平無毒主婦人乳癰腫水煮汁飲之又封之立消

疏○蒲公英得水之沖氣故其味甘平其性無毒當是入肝入胃解熱涼血之要藥乳癰屬肝經婦人經行後肝經主事故主婦人乳癰腫乳毒竝宜生噉之良

主治參互

蒲公英得夏枯草貝母連翹白芷栝樓根橘葉甘草

頭垢牡鼠糞山豆根山慈菰治一切乳癰毒腫痛及
治乳巖為上藥 圖經治惡刺及狐尿刺摘取根莖
白汁塗之惟多塗立差此方出孫思邈千金方其序
云余以貞觀五年七月十五日夜以左手中指背觸
著庭木至曉遂患痛不可忍經十日痛日深瘡日高
大色如熟小豆色嘗聞長者之論有此方遂依治之
手下即愈痛亦除瘡亦即瘥未十日而平復如故楊
炎南行方亦著其效云 梅師方治產後不自乳兒

畜積乳汁結作癰取蒲公英搗傳腫上日三四度易之
此草單治乳癰及腫毒性既甘平無毒又乏他用故無簡誤

穀精草味辛溫無毒主療喉痺齒風痛及諸瘡疥飼馬
主蟲類毛焦等病

疏○穀精草得金氣故味辛所言氣溫者應曰微溫
故其性無毒入足厥陰經又入足陽明經補肝氣之
要藥也辛能散結微溫能通氣喉痺者手少陰心火

與足少陽相火相扇上壅而成散二經之火則氣通而無所結滯矣齒風痛者陽明胃家風火熱盛上衝之所致也熱則生風風火相搏故發齒風痛也諸瘡疥之生皆由於血熱諸痛痒瘡瘍皆屬心火藥宜辛散故悉主之其用以飼馬主蟲類毛焦等病者以馬性多熱又為風熱所傷故主之也以其入肝補益肝氣故為治目散翳之上藥而本經不載是謂闕文

主治參互

穀精草得決明子木賊草甘菊花蜜蒙花生地黃專
除目病障翳 集驗方治偏正頭痛用穀精草一兩
為末以白麩糊調攤油紙上貼痛處乾換 聖惠方
治鼻衄不止穀精草為末熟麩湯服二錢 明目方
治目中翳膜穀精草防風等分為末米飲服之甚驗
邵真人濟急方治痘後目翳隱澀淚出久而不退
用穀精草為末以肺或猪肝片蘸食一方加蛤粉等
分同入猪肝內煮熟日食之 衛生家寶方治小兒

雀盲至晚或不見物用羯羊肝一具不用水洗竹刀
剖開入穀精草一撮瓦礫煮熟日食之屢效忌鐵器
如不肯食炙熟搗作丸菜豆大每服三十九茶下

保幼大全治小兒中暑吐瀉煩渴穀精草燒存性用
器覆之放冷為末每冷米飲服半錢 此藥味淡性
無毒喉痺齒痛目翳之外無他用故不著簡誤

夏枯草味苦辛寒無毒主寒熱瘰癧鼠瘻頭瘡破癥散

癭結氣脚腫濕痺輕身

土瓜為
之使

疏○夏枯草得金水之氣故其味苦辛而性寒無毒
為治療癰鼠瘻之要藥入足厥陰少陽經丹溪謂其
補厥陰肝家之血又辛能散結苦寒能下泄除熱故
治一切寒熱及消癰癰鼠瘻破癥散癭結氣頭瘡皆
由於熱脚腫濕痺無非濕熱所成熱消結散濕去則
三證自除而身亦輕矣

主治參互

夏枯草得連翹忍冬藤貝母玄參薄荷桔樓根紫背

天葵蓖麻子仁甘草治一切瘰癧有效 得蒲公英
治一切乳癰乳巖方具蒲公英條下 單取數兩水
煮濃汁入生甘菊紫花地丁忍冬藤連翹白及白欝
甘草生地黃白芷半枝蓮消一切癰疽腫毒止痛有
神此複方也 簡要濟衆方治肝虛目睛疼冷淚不
止血脈痛羞明怕日夏枯草半兩香附子一兩為末
每服一錢茶調下 衍義云古方用以燒灰合潔面
藥初生嫩時作菜食之須浸洗淘去苦水 此草無

毒除治癰癧鼠瘻及散癭結氣消癰腫乳毒之外無
別用故不著簡誤

山慈菘根有小毒主癰腫瘡癩癰癧結核等醋磨傅之
亦剝人面皮除疥黧

疏○山慈菘味辛氣寒善散熱消結故主癰腫瘡癩
癰癧結核等昔人用醋磨傅今人亦入服藥中產處
州遂昌縣實非金燈花與鹿蹄草葉似車前

主治參互

入玉樞丹紫金錠大內觀音救苦錠磨傅并服消一切疔腫癰疽解一切蛇蟲毒有神方中有大戟用此不得服甘草誤則殺人亦入乳巖乳毒方用相宜因無別用故不著簡誤

燈心草味甘寒無毒根及苗主五淋生煮服之敗席煮

服更良

入藥宜用生草

疏○燈心草氣味甘寒則無毒可知入心小腸藥也其質輕通其性寒味甘淡故能通利小腸熱氣下行

從小便出小腸為心之腑故亦除心經熱也

主治叅互

燈心草以鹹酒浸透入雞子殼中封固煨存性研細
加梁上倒掛塵及青魚膽明礬銅青點咽喉生乳蛾
有神效 經驗方治小兒夜啼用燈心燒灰塗乳上
與喫 勝金方治破傷多用燈心草爛嚼和唾貼之
用帛裹血立止 又方治小蟲蟻入耳挑不出者以
燈心浸油釣出蟲

簡誤

性專通利虛脫人不宜用

馬勃味辛平無毒主惡瘡馬疥一名馬庀

疏○馬勃感土金之氣而生故味辛氣平而無毒宜
其主惡瘡馬疥及止凍瘡也衍義曰去膜以蜜揉拌
少以水調呷治喉痺痛則辛散之功也

主治叅互

經驗良方治走馬喉痺馬屁勃即灰菰焰硝各一兩

為末每吹一字吐涎血即愈 普濟方治久嗽不止

馬勃為末蜜丸梧子大每服二十九白湯下即愈

斑瘡入眼馬屎勃蛇皮各五錢皂角子十四箇為末
入確內鹽泥固濟煨存性研每溫酒服一錢此閻孝
忠集效方也 因無別用故不著簡誤

水蓼主蛇毒搗傅之絞汁服止蛇毒入內心悶煮漬將
脚消氣腫

疏○水蓼感金水之氣而兼有土故味辛性冷而無

毒陰中微陽冷而辛所以能解蛇毒入內心悶及水
煮漬將脚消氣腫也

主治叅互

集驗方治脚痛成瘡先剉水蓼煮湯令溫熱得所頻
頻淋洗瘡乾自安 衍義治療癰水紅子不拘多少
微炒一半生用一半同為末好酒調二錢日三服食
後夜卧各一服破者亦治

海金沙主通利小腸得梔子馬牙硝蓬砂共療傷寒熱

狂

疏○海金沙味甘淡氣寒性無毒甘寒淡滲之藥故
主通利小腸得牙硝梔子皆鹹寒苦寒之極又得蓬
砂之辛所以能治傷寒熱狂大熱當利小便此釜底
抽薪之義也淡能利竅故治熱淋血淋膏淋等病乃
手太陽小腸經藥也

主治叅互

夷堅志治熱淋急痛海金沙草日中曝之令小乾紙

襯以杖擊之有細沙落紙上旋收之且曝且擊以沙
盡為度研細煎生甘草湯調服二錢 圖經本草治
小便不通臍下滿悶海金沙一兩臘南茶半兩搗碎
每服三錢生薑甘草煎湯下日二服 仁存方治膏
淋如油海金沙滑石各一兩甘草梢二錢半為末每
服二錢麥門冬煎湯服日二次 普濟方治血淋痛
澀但利水道則清濁自分海金沙末新汲水或沙糖
水服一錢 蘭臺秘藏治脾濕腫滿腹脹如鼓喘不

得卧海金沙散用海金沙三錢白朮四兩甘草半兩
牽牛子一兩半為末每服一錢煎倒流水調下得利
為妙元氣虛人禁服此方

簡誤

海金沙性淡滲而無補益小便不利及諸淋由於腎
水真陰不足者勿服

草三稜根味甘平溫無毒療產後惡血通月水血結墮
胎破積聚癥瘕止痛利氣一名雞爪三稜

疏○草三稜即雞爪三稜與京三稜其實一類但以所產之地與形質不同為別耳破散剋削之性一同乎京三稜故參互簡誤亦同茲不復贅

鹿藥味甘溫無毒主風血去諸冷益老起陽浸酒服之

生姑臧巴西根苗竝似黃精根鹿好食

俗呼鹿跑草又名延壽果

疏○鹿藥得土中陽和之氣以生故其味甘其氣溫其性無毒甘能益血甘能入脾甘溫益陽氣故能主風血去諸冷而益老起陽也當與黃精萎蕤枸杞之

類同科氣味和平性本無毒補益之外無別治療故
不著主治簡誤

草石蠶生高山石上根如箸上有毛節如蠶葉似卷柏
山人取浸酒除風破血主溪毒煮食之

疏○按草石蠶本經無氣味予見明州好事者以水
漬羊肚石種之盤生石上儼類蠶形得水石之氣性
必清寒故能解毒予少時見一老醫治毒痢下血久
不愈方中有之後予按其法試用良驗

主治叅互

草石蠶同川黃連白芍藥各酒浸炒肉豆蔻糯粉裹
煨蓮肉白藕豆俱炒橘皮炙甘草升麻山查和為末
蜜湯調服治久痢不止往往獲效當是涼血破瘀血
消積滯之功也無別用故不著簡誤

漆姑草氣辛烈主漆瘡按研傳之熱更易亦主溪毒瘡
疏○漆姑草藏器云氣辛烈然觀其多生石間及堦
墀陰處必是辛苦寒之藥辛能散苦能泄故主漆瘡

溪毒瘡及大人小兒丹毒總之其氣味辛涼治一切
血熱為病之要藥也



神農本草經疏卷十一